

Air naik mengejut tiga kali dalam dua bulan

BH 27/6/06

KOTA KINABALU: Penghuni rumah pangsa Projek Perumahan Rakyat (PPR) Taman Jaya Diri di Menggatal, dekat sini, mendakwa banjir lumpur yang melanda kediaman mereka secara mengejut petang semalam adalah yang ketiga berlaku dalam tempoh dua bulan.

Pemilik kedai, Aisyah Abdullah, 35, berkata banjir lumpur semalam adalah yang paling teruk. Air naik secara mendadak dalam masa 10

minit saja.

"Awalnya hanya longkang di tepi bangunan dipenuhi air tetapi dalam sekelip mata, paras air terus meningkat hingga kami kelam-kabut memindahkan barang.

"Air naik hingga mencecah paras paha dan banjir itu mungkin disebabkan limpahan dari parit besar berhampiran bangunan ini," katanya ketika ditemui, petang semalam.

Seorang penghuni, Nomi Ansilan,

35, berharap pihak bertanggungjawab mengambil tindakan segera menangani masalah banjir kilat yang kerap melanda ketika hujan lebat.

Sementara itu, Pegawai Perhubungan Awam Jabatan Bomba dan Penyelamat Malaysia (JBPM) negeri, Ibnu Suhud Punggak, berkata belum ada operasi pemindahan akibat banjir dilakukan setakat petang semalam.

"Bilik gerakan bencana Jabatan

Bomba dan Penyelamat beroperasi 24 jam dan setakat ini tidak ada penduduk yang dipindahkan.

"Bagaimanapun, kita harapkan kerjasama penduduk di kawasan berisiko tinggi supaya segera berpindah jika hujan berterusan," katanya.

Di **TUARAN**, lebih 2,000 penduduk dari 10 kampung di daerah itu terjejas akibat hujan lebat berterusan lebih lapan jam sejak petang kelmarin.

Walaupun tiada penduduk dipindahkan, langkah berjaga-jaga tetap diambil pihak berkuasa daerah bagi memantau keadaan.

Di **MEMBAKUT**, ratusan penduduk di beberapa kampung menjadi mangsa banjir, dengan keadaan paling teruk dilaporkan di Kampung Bambang, Sinduk dan Sinuko.

Kampung lain yang terjejas ialah Jambatan Baru, Lumat, Baitam, Lumantak, Bawan, Takapan, Lampijas dan Brunei.